## 『唐大和上東征傳』 (是歳唐天寶元載冬十月)

唐大和上東征伝

真人元開撰

是歳唐天寶元載冬十月。〈日本天平十四年歳次辛巳也〉時大和上在楊州大明寺、為衆僧講律。栄睿・普照師至大明寺、頂禮大和上足下、具述本意曰。「佛法東流、至日本國。雖有其法。而無傳法人。本國昔聖徳太子曰。『二百年後。聖教興於日本。』今鍾比運。願和上東遊興化。」大和上答曰。「昔聞。南岳惠思禪師遷化之後。託生倭國王子、興隆佛法。濟度衆生。又聞。日本國長屋王。崇敬佛法。造千袈裟。來施此國大徳衆僧。其袈裟緣上。繡著四句曰。『山川異域。風月同天。寄諸佛子。共結來緣。』以此思量。誠是佛法興隆有緣之國也。今我同法衆中。誰有應此遠請。向日本國傳法者乎。」時衆默然。一無對者。良久有僧祥彦。進曰。「彼國太遠。性命難存。滄波(海ィ)淼漫。百無一至。人身難得。中國難生。進修未備。道果未尅。是故衆僧。咸默無對而已。」和上曰。「是為法事也。何惜身命。諸人不去。我卽去耳。」祥彦曰。「和上若去。祥彦亦随去。」爰有僧道興・道杭・神項・崇忍・雲璨(登ィ)・明烈・道默・道因・法藏(載ィ)・老靜(曇ィ)・道翼・幽巖・如海・澄觀・徳清・思託等廿一人。願同心随和上去。